

आकाशवाणी

खबरां ----

1. प्रधानमंत्री नरेंद्र मोदी होरें आदि थिरूवती राय उत्सव च हिस्सा लैता जेदा चोला वंश दे महाराज राजेंद्र चोला प्रथम हुंदे प्रति सम्मान दे रूपै च आयोजित कीता गेआ।
2. मोदी होरें “मन की बात” कार्यक्रम राएं लोकें गी भारत च बने दे उत्पाद खरीदने दा आह्वान करदे होई आखेआ जे 2047 तगर भारत गी विकसित राष्ट्र बनाने लेई आत्मनिर्भरता जरूरी।
3. रक्षामंत्री राजनाथ सिंह होरें आखेआ जे भारत नै पिछले 11एं बरें च ढांचागत ते लॉजिस्टिक क्षेत्र च बड़ा मता बदलाव दिक्खेआ ऐ जेदे नै मुलखै दी आर्थिक तरक्की लेई इक निगार मुंड तैयार होआ ऐ।
4. उत्तराखंड दे हरिद्वार च मंसा दे मंदरै च मची दी नस्स भज्ज च 6एं जनें दी मौत, 20 जखमी।
5. इजराइल नै मनुक्खी सहायता दी पुज्ज लेई गजा दे त्रै इलाकें च 10 घंटे लेई फौजी कार्रवाई रोकने दा ऐलान कीता ऐ।
6. भारती एथलीट सीमा जर्मनी च आयोजित युनिवर्सिटी गेम्स च मैडल जित्तने आहली पैहली भारती महिला एथलीट बनी गेई ऐ।



PM-Chola

प्रधानमंत्री नरेंद्र मोदी होरें अज्ज आदि थिरुवतीराय उत्सव दे समापन समारोह च हिस्सा लैता। तमिलनाडू दे अरियालुर जिले च चोला शासक राजेंद्र चोला प्रथम दी जन्मजयंती दे सिलसिले च आयोजित इस कार्यक्रम च मोदी होरें महान शासक दे सम्मान च यादगारी सिक्का बी जारी कीता ते गंगाईकोंडा चोलापुरम मंदरै च मत्था बी टेकेआ।



PM-MKB

प्रधानमंत्री नरेन्द्र मोदी होरें अज्ज ग्रुप कैप्टन शुभांशु शुक्ला हुं'दी कामयाबी दा जिक्र कीता ते आखेआ जे इस उपलब्धि दे बाद अंतरिक्ष गी लेइयै बच्चें च इक नमीं जिज्ञासा पैदा होआ'रदी ऐ ते हून बच्चे अंतरिक्ष वैज्ञानिक बनने दी तांग रक्खा करदे न। 21मीं सदी दे भारत च विज्ञान इक नमीं उर्जा कन्नै अगड़ा बदा करदा ऐ। श्री मोदी होरें देशवासियें गी दस्सेआ जे साढे विद्यार्थिं इंटरनेशनल कैमिस्टरी ओलंपियाड च तगमे जित्तियै देसै दा नांऽ रोशन कीता ऐ। एह्दे अलावा अस्ट्रेलिया च होए दे इंटरनेशनल मैथामैटिकल ओलंपियाड च बी भारती विद्यार्थिं सुन्ने दे 3, चांदी दे 2 ते कैहू दा 1 तगमा हासल कीता ऐ। प्रधानमंत्री होरें अगले म्हीने मुंबई च आयोजित होने आहले एस्ट्रोनॉमी ते एस्ट्रो-फीज़िक्स ओलंपियाड दा बी जिक्र कीता ते आखेआ जे एह्दे च 60 शा मते मुल्खें दे विद्यार्थी ते वैज्ञानिक औडन ते एहू हूनै तोहड़ी दा सभ्भनें शा बड्डा ओलंपियाड होगा। प्रधानमंत्री होरें यूनेस्को आसेआ 12 मराठा किलें गी विश्व विरासती स्थलें दे रूपै च मानता दित्ते जाने दी उपलब्धि दा बी जिक्र कीता। एहू मराठा किले ऐसी अद्भुत थाह्हां

न जिनें केई हमलें ते खराब मौसम दी मार झल्ली पर कदें बी अपने आत्म-सम्मान गी झुकन नेई दित्ता। हर बारी आह्ला लेखा अपने अज्जै दे मन की बात कार्यक्रम च प्रधानमंत्री होरें इक बारी फही देसै दी आजादी लेई बलिदान देने आहले म्हान सेनानिएं गी चेत्ता कीता। खुदीराम बोस हुं'दा जिक्र करदे होई श्री मोदी होरें आखेआ जे ऐसे अनगिनत बलिदानिएं दी तपस्या ते बलिदान दे बाद गै असें'गी आजादी मिली ही। पैहली अगस्त गी बाल गंगाधर तिलक हुं'दी पुन्नतिथि बारै बचार सांझे करदे होई मोदी हारें आखेआ जे अगस्त दा म्हीना क्रांति दा म्हीना ऐ। 8 अगस्त गी गांधी जी हुं'दे नेतृत्व च भारत छोड़ो आंदोलन दी शुरु होई ही ते फही 15 अगस्त साढा स्वतंत्रता दिवस ऐ। प्रधानमंत्री होरें 14 अगस्त गी देसै दी बंडु कन्नै जुडे दे विभाजन विभीषिका दिवस दा बी जिक्र कीता। 7 अगस्त गी मनाए जाने आहले राश्ट्री हत्थखड्डी दिवस दा जिक्र करदे होई प्रधानमंत्री होरें आखेआ जे इस ब'रे राश्ट्री हत्थखड्डी दिवस दे 10 ब'रे पूरे होआ करदे ना केई स्टार्ट-अप्स नै भारत दी हत्थखड्डी पन्ध्यान गी वैश्विक उंचाई दित्ती ऐ। वोकल फॉर लोकल बारै बचार सांझे करदे होई मोदी होरें देशवासियें गी अपील कीती जे ओह ओकड़ियां चीजां खरीदन जेह्णियां भारत च बनी दिआं होन ते जिनें'गी बनाने च कुसै भारती दा परसीना बगे दा होऐ। मन की बात च इक बारी फही पर्यावरण संरक्षण दा स्नेहा दिं'दे होई मोदी होरें ओडिशा दे क्योँझर जिले दी इक अनोखी पैहलकदमी दा जिक्र कीता जित्थै भजन ते कीर्तन दे राहें जंगलें च लग्गने आहली अग्गी दे प्रति लोकें गी जागरूक कीता जा'रदा ऐ। प्रधानमंत्री होरें काजीरंगा नेशनल पार्क च कीते गेदे ग्रासलैंड बर्ड सेंसस दा बी जिक्र कीता ते बड़ी खुशी कन्नै देशवासियें गी दस्सेआ जे इस सेंसस दे दरान पंछिएं दिएं 40 शा मती प्रजातिएं दी पन्ध्यान होई ऐ। उनें आखेआ जे टेक्नोलॉजी ते

संवेदनशीलता जिसलै किट्टे होई जंदे न तां कुदरत गी समझना मता सौक्खा होई जंदा ऐ।
ऐसे जतनें गी पक्क गै बढावा देना लोडचदा ऐ तांजे अस अपनी जैविक बन्न-सबन्नता गी
पन्ध्यानी सकचै ते अगली पीठी गी बी एहदे'नै जोड़ी सकचै।

<><><><><><>

MKB-Announcement

आकाशवाणी जम्मू दा क्षेत्रीय समाचार एकांश प्रधानमंत्री हुंदे “मन की बात” कार्यक्रम
दी 124मीं कड़ी पर 30 मिनटें दे इक्क टकोहदे चर्चा कार्यक्रम दा सरिस्ता करा करदा ऐ।
एह विशेष प्रसारण अज्ज रातीं साढ्हे 10 बजे प्रसारित कीता जाग। चर्चा च स्हाढे परौहने
होडन मन्ने-परमन्ने दे सीनियर पत्रकार प्रदीप दत्ता जेडे प्रधानमंत्री हुंदे अज्ज प्रसारित
होए दे “मन की बात” कार्यक्रम च पुट्टे गेदे विषें ते मुद्दें पर अपने बचार सांझे करडन।
कार्जक्रम दी मेजबानी स्हाढे एंकर विजय बजाज होर करडन। इस्सै चाल्ली दे होर दुए
जानकारी आहले प्रसारणें ताई आकाशवाणी समाचार जम्मू गी 990 किलोहर्ट्ज 100.3
एफ.एम ते 104.5 मैगाहर्ट्ज पर सुनदे रवो।

<><><><><><>

Rajnath-Convocation

रक्षा मंत्री राजनाथ सिंह होरें आखेआ ऐ कि आपरेशन सिंदूर दी कामयाबी च निर्विघ्न
लॉजिस्टिक प्रबंधन इक फैसलाकुन कारक साबत होआ ऐ। अज्ज गुजरात दे बडोदरा च
गतिशक्ति विद्यालय दे दीक्षांत समारोह गी वर्चुअल ढंग्गै नै संबोधित करदे होई रक्षा
मंत्री होरें कन्नै इब्बी आखेआ जे लाजिस्टिक गी छड़ा सम्यान पुजाने दी प्रक्रिया दे रूपै च

गै नेही दिक्खेआ जाना लोडचदा। उनें गलाया जे देसै दी आर्थिक तरक्की च लाजिस्टिक उत्पादन कोला लेइयै उपभोक्ता तगर हर गेड गी जोडने आहली प्रमुख कडिएं चा इक ऐ। उनें आखेआ जे भारत नै पिछले 11 बरें च सदा थमां मता बुनियादी ढांचे दा विकास दिक्खेआ ऐ ते इस बदलाव दी बुनियाद नीतिगत सुधारें ते मिशन मोड परियोजनाएं दे राएं रक्खी गेई ऐ। उनें आखेआ जे एहदा असर शडा भौतिक संपर्क तगर गै सीमित नेही सगुआं एहदे च आर्थिक उत्पादकता च बाद्दा, लाजिस्टिक लागत च कमी ते सेवाएं दी बंड च बी सुधार कीता गेआ ऐ। गतिशक्ति विद्यालय दी भूमिका पर लो पांदे होई रक्षा मंत्री होरें आखेआ कि जिस रफ्तार कनै नोजवान देसै गी शक्ति प्रदान करा करदे न, एह सराहनेजोग ऐ। उनें डिजिटलीकरण, स्वचालन, रीयल टाइम ट्रैकिंग, आर्टिफिशल इंटेलिजेंस सक्षमता जनेए क्षेत्रें दा पूरा इस्तेमाल करना, मजूदा समें दी लोड दस्सी।



PM-Rating

प्रधानमंत्री नरेन्द्र मोदी, दुनिया दे सब्भनें शा लोकप्रिय लोकतांत्रिक नेता दे रूप च उभरे ना। अमरीका च स्थित डेटा एनालिटिक्स फर्म 'मॉर्निंग कंसल्ट'दे इक सर्वेक्षण च श्री मोदी होरें'गी 75 फीसद रेटिंग मिली ऐ। सर्वेक्षण च प्रधानमंत्री मोदी होरें'गी दुनिया च अपने हमरूतबा नेताएं थमां बडा अगगे दस्सेआ गेआ ऐ। दक्खन कोरिया दे राष्ट्रपति ली जे-म्यांग 59 फीसद रेटिंग दे कन्नै दुई ते अर्जेटीना दे राष्ट्रपति जेवियर माइली त्रीये नम्बरै पर ना। सर्वेक्षण च हर इक देशै दी बालिग आबादी मझाटै बचारें दा आंकलन करने लेई 7एं ध्याडें दे औसत शोध दा इस्तेमाल कीता गेआ। अमरीका दी बिजनेस इंटेलिजेंस

कंपनी मॉर्निंग कंसल्ट नै एह सर्वेक्षण कीता ऐ ते एह वैश्विक नेताएं दी 'एप्रूव्ड रेटिंग ट्रेकर' दा इक हिस्सा ऐ। मई, 2024 च लगातार त्रीऽ बारी प्रधानमंत्री बनने आहले श्री मोदी आलमी सतह दी इस दर्जेबंदी च प्रमुख थाहै पर न, ते एह उं'दी घरेलू लोकप्रियता ते बधदी अंतरराष्ट्री मान्यता गी दर्शांदा ऐ। अमरीका दे राष्ट्रपति डॉनल्ड ट्रम्प इस सर्वेक्षण च 8मीं थाहै पर ना। उ'नेंगी छड़ी 44 फीसद रेटिंग मिली ऐ। प्रधानमंत्री मोदी हुं'दी एह उपलब्धि उं'दे राजनीतिक सफर च इक होर महत्वपूर्ण गैह ऐ। कल उ'नें अपने कार्यकाल दे चार जहार 79 दिन पूरे कीते। ओह इंदिरा गांधी होरें'गी पिच्छे छोड़दे होई भारत दे सब्भनें शा लम्मे समें तगर लगातार कार्यकाल आहले दुए प्रधानमंत्री बनी गे ना। प्रधानमंत्री मोदी हून देशे दे पैहले प्रधानमंत्री पंडित जवाहरलाल नेहरू हुं'दे थमां गै पिच्छे ना।



Haridwar

उत्तराखंड दे हरिद्वार च मनसा देवी मंदर च मची दी नस्सभज्ज च 6एं जनें दी मौत होई गेई ऐ ते 20 दुए घायल होई गे ना। एह नस्स-भज्ज बिजली दे हाई बोल्टेज तार त्रुट्टियै डिगने कारण मची, उत्तराखंड पुलस, राज्य आपदा मोचन बल ते होर अपात सेवा दल तुरत मौके पर पुज्जियै बचा ते राहत कम्में च लग्गी गे। घायलें गी नेडे दे अस्पताल पुजाया गेआ जित्थे उंदा इलाज चलै करदा ऐ। सरकारै मरोने आहलें दे नेडमें सरबंधी गी 2-2 लक्ख ते घायलें गी 50-50 जहार रपे दी सहायता देने दी घोषणा कीती ऐ।



Prez. PM Haridwar

राश्ट्रपति द्रौपदी मुर्मू ते प्रधानमंत्री नरेंद्र मोदी होरें उत्तराखंड दे हरिद्वार च मनसा देवी मंदर रस्ते च पेदी नस्सभज्ज च कीमती जानी नुकसान पर गैहरा दुख प्रगट कीता ऐ। राश्ट्रपति ते प्रधानमंत्री होरें सौगी परौआरें कन्नै हमदर्दी प्रगट कीती ते घायलें दे तौले नरोए होने दी कामना बी कीती।



APJ-Addul Kalam Death Anniversary

राश्ट्र अज्ज साबका राश्ट्रपति ते मन्ने-परमन्ने दे साइंसदान डाक्टर ए.पी.जे अबदुल कलाम गी उं'दी पुण्यतीथि पर श्रद्धांजलि अर्पित करा करदा ऐ। डाक्टर कलाम होरें भारत दे अंतरिक्षा ते मिसाइल विकास कार्जक्रमें च महत्वै आहली भूमिका निभाई। डाक्टर अब्दुल कलाम होरें'गी भारत दा मिसाइल मैन बी आखेआ जंदा ऐ। प्रधानमंत्री नरेंद्र मोदी होरें साबका राश्ट्रपति गी उं'दी पुण्यतीथि पर श्रद्धांजलि भेंट कीती। इक सोशल मीडिया पोस्ट च श्री मोदी होरें आखेआ जे डाक्टर कलाम गी इक्क प्रेरक, दूरदर्शी, बेजोड़ साइंसदान, रहनुमा ते इक महान देशभक्त दे तौरा पर चेत्ता कीता जंदा ऐ।



Thailand-Combodia

अमरीका दे राष्ट्रपति डोनाल्ड ट्रम्प पासेआ युद्ध विराम दे आह्वान दे बावजूद थाईलैंड कंबोडिया दी सरहद पर अज्ज चौथे ध्याडे बी गोलीबारी जारी रेई। दौनें पक्खें इक्क-दुए पर सीमा विवाद भडकाने दा आरोप लाया ऐ। थाईलैंड दी सरकारै आखेआ ऐ जे ओह फौजी कार्रवाई रोकने गी तैयार नेई ऐ। थाईलैंड नै कंबोडिया पर सरहदी सुरिन प्रांत दे नागरिक इलाकें पर गोलीबारी करने दा आरोप लाया ऐ। थाईलैंड दे विदेश मंत्रालय नै आखेआ जे फौजी कार्रवाई गी उसलै तगर नेई रोकेया जाई सकदा जिसलै तगर कंबोडिया मनुक्खी अधिकारें दे मुंडले सिद्धांतें दी खलाफवर्जी करदा रौहग। थाईलैंड च अज्ज बडुलै मूह न्हरे कंबोडिया पर ड्रोन टैंक ते कलस्टर बम्बे कन्नै हमला कीता।

<><><><><><>

Polio-Pak

पाकिस्तान च पोलियो दे त्रै नमें मामले दर्ज कीते गें इनेंगी रलाइयै पाकिस्तान च इस बारे पोलियो दे मामलें दी गिनतरी बदियै 17 होई गेई ऐ। खैबर पख्तूनख्वा च दो ते सिंध च इक्क नमा मामला सामने आया ऐ।

<><><><><><>

Israel-Military Pause

इस्राइल नै मनुक्खी सहायता दी पुज्ज लेई गजा दे त्रै इलाकें च 10 घंटे लेई फौजी कार्रवाई रोकने दी घोषणा कीती ऐ। एह रोक हर रोज बडुलै 10 बजे कोला लेइयै राती 8 बजे तगर अलमवासी, दैर अल बलाह ते गजा नगर च लागू रौहग। इस्राइल नै एह फैसला संयुक्त राष्ट्र ते अंतरराष्ट्रीय संगठनें दे सहयोग कन्नै लैता ऐ।

Mandviya-Gujrat

केंद्री मंत्री मनसुख मांडविया होरें देसै दे शिक्षा इदारे दे आधुनिकीकरण पर बल पाया ऐ। श्री मांडविया अज्ज अहमदाबाद, गुजरात, विद्यापीठ च गुजरात तालीम संघ आमसभा, 2 बरें च होने आहले राज्य सतह दे सम्मेलन गी संबोधित करा करदे हे। उनें प्राथमिक शिक्षा पर जोर पांदे होई आखेआ जे नशा इक्क नेई समस्या ऐ जेदे हल लेई सब्बने गी अगगे आना लोड़चदा ऐ। एहदे शा पैहले डॉक्टर मांडविया होरें संडे आन साइकल कार्जक्रम च बी हिस्सा लैता।



Pujnab

पंजाब पुलस नै अमृतसर च अज्जै-कल्लै दे हथियारें ते नशीले पदार्थे दी तस्करी दे सरहद पार थमां दे इक बड्डे नेटवर्क दा खुलासा कीता ऐ। इस सिलसिले च पाकिस्तान स्थित आई.एस.आई कन्नै संपर्क रखने दे आरोप च 5 लोकें गी गिरफ्तार कीता गेआ ऐ। राज्य दे पुलस महानिदेशक गौरव यादव होरें दस्सेआ जे आरोपियें दी गिरफ्तारी ते उन्दे कोला हथियारें दी जब्ती थमां इक्क व्यापक आतंकवादी गैंगस्टर गठजोड़ दा शारा थ्होंदा ऐ।



Travel-Ratna Award

मुख्यमंत्री उमर अब्दुल्ला हुंदे सलाहकार नासिर असलम वानी ते गुलमर्ग थमां विधायक फारूक शाह होरें नमीं दिल्ली च 10में अंतरराष्ट्री सैलसफा सम्मेलन पुरस्कार यानि ITCTA कार्जक्रम 2025 च मुख्यमंत्री हुं'दी थाहरै पर ट्रैवल रतन अवार्ड हासल कीता।

मुख्यमंत्री उमर अब्दुल्ला होंरें जम्मू-कश्मीर दे सैलसफा मैहकमे गी प्रदेश च सैलसफा गी
बढ़ावा देने लेई कीते जा'रदे जत्तें लेई सराहना कीती ते इस मान्यता लेई बधाई बी दिती।

